



Govornu Submete ona Proposta OGE 2025 ba Parlamentu Nasional

Tersa- feira 01 de Outubro 2024 foin lalais ne'e, iha Uma Fukun Parlamentu Nasional, Governu Da-IX liu husi Ministeriu Finansas, submete proposta Orsamentu Jeral Estadu 2025 (OJE 2025) ho total konsolidadu1 millaun \$2.177,2 ba Presidenti Parlamentu Nasional, Sra. Fernanda Lay. Total OJE 2025 laos-konsolidadu hamutuk millaun \$2.617,2 ne'ebé inklui iha laran Fundo Reserva Seguransa Sosial.

Depois de termu entrega Ministra Finansas, Sra. Santana Jose Rodrigues Ferreira Viegas Cardoso, haklaken "Ohin, Governu Konstitusionál Da-IX apresenta ona proposta OJE 2025 ba Parlamentu Nasionál atu hetan konsiderasaun. Orsamentu ida-ne'ebé dezeña atu dudu kreximentu ekonómiku, hametin infraestrutura, no hadi'a sidadeun sira-nia moris-di'ak iha Timor-Leste laran tomak."

"Pontu importante sira husi proposta OJE 2025 nian inklui:

Orsamentu konsolidadu ba Administrasaun Sentrá, RAEOA no Seguransa Sosial (la inklui Fundu Rezerva Seguransa Sosiál) mak millaun \$2.177,22. Eksklui Seguransa Sosial, orsamentu konsolidadu ba Administrasaun Sentrá no RAEOA hamutuk millaun \$2.125,2. Montante ida ne'e maka aumentu 12.4% hosi \$1.890.0 ne'ebé aprova ba tinan 2024. Totál alokasaun orsamentu laos-konsolidadu hamutuk millaun \$2.617,2 ho montante millaun \$2.073,03 ba Administrasaun Sentrá, montante millaun \$62.2 ba RAEOA, no millaun \$482,0 ba Seguransa Sosiál (inklui Fundu Rezerva Seguransa Sosiál millaun \$305,7)," hatutan Ministra Finanças.

Ministra Finansas mos esklerese tan katak projesaun kreximentu PIB maka 4.1% ba 2025, ne'ebé suporta husi aumentu iha Governu nian despeza no investimentu estratéjiku. Alokasaun significativu husi orsamentu konsolidadu ba Administrasaun Sentral no RAEOA ba setór xave sira hanensan: Kapitál Sosiál: millaun \$741 (35% husi total orsamentu konsolidadu); Dezenvolvimentu Infraestrutura: millaun \$654 (31% husi total orsamentu konsolidadu); Dezenvolvimentu Ekonomia: millaun \$157 (7% husi total orsamentu konsolidadu), no kuadramentu Institusionál: millaun \$574 (27% husi total orsamentu konsolidadu). Alende ne'e mos aumenta investimentu iha kapitál dezenvolvimentu ho millaun \$440, ka aumenta millaun \$29 kompara ho OJE 2024.



"Hasa'e fokus ba programa sira kona-ba bem-estár sosiál, inklui transferénsia ne'ebé aumenta ba Fundu Kombatente Libertasaun Nasional no Fundu Seguransa Sosiál. Halo Investimentu estratéjiku iha infraestrutura turizmu no dezvoltamentu kampu petróleu Greater Sunrise," deklara Ministra Santana.

Fontes finansiametu despesas Administrasaun Sentral mai husi: reseitas domestika millaun \$257.9, transferénsia husi Fundu Mina-rai millaun \$1.581,1, balansu kaixa tezouru millaun \$200,0, empréstimo millaun \$45,0, no orsamentu apoiu direta millaun \$9,0. Fontes finansiametu despesas RAEOA mai husi: reseitas laos-fiskal millaun \$0,7, balansu kaixa tezouru millaun \$51,5 no transferénsia husi Administrasaun Sentral millaun \$10,0. Fontes finansiametu despesa INSS maka reseita própias millaun \$52,1 no transferénsia husi Administrasaun Sentral millaun \$124,2 (eksklui FRSS millaun \$305.7).

Iha parte seluk Primeiru-Ministru Kayrala Xanana Gusmão hateten "Proposta orsamentu ida-ne'e reflète ita-nia kompromisu ba 'investimentu iha Infra-estrutura Estratéjika, Hametin Ekonomia no Hadi'a Bem-estár Sidadaun sira-nian'. Ho objetivu atu halo balansu ba kreximentu ekonómiku imediatu no hasoru dezafiu prinsipál sira hanesan diversifikasaun ekonómika no hamenus dependénsia ba Fundu Mina-rai nian."

Governu pruntu atu defende proposta ne'e no servisu hamutuk ho Parlamentu Nasionál hodi asegura orsamentu ida-ne'ebé forte no efetivu ba benefísiu sidadaun Timor-oan hotu-hotu nian.

Proposta orsamentu ne'e entrega husi Ministra Finansas, Vice-Ministra Finansas, hamutuk ho Jestores Ministeriu Finansas nian no akumpanha mos husi Secretário Estado Comunicação Social, Sr. Expedito Dias Ximenes.

1 Konsolidadu signifika eliminia transferénsia entre sub-setores iha OJE hodi evita sura/konta dobro. 2 Administrasaun Sentral millaun \$1.938,7 + Seguransa Sosial (eksklui FRSS) millaun \$176,3 + RAEOA millaun \$62.23 Despesa Administrasaun Sentral millaun \$1.938,7 + transferénsia Adm. Sentral ba Seguransa Sosial millaun \$124.3 + transferénsia Adm. Sentral ba RAEOA millaun \$10,0.